

劉兆祐博士主編
中國史學叢書三編

皇明寶訓
(六)

臺灣學生書局印行

劉兆祐博士主編
中國史學叢書三編

皇明寶訓
(六)

臺灣學生書局
印行

大明孝宗敬皇帝寶訓卷之三

光祿大夫柱國少傅兼太子太傅禮部尚書武英殿大學士臣呂本謹校

南京禮部祠祭清吏司郎中臣陳淦

南京兵部職方清吏司主事臣朱錦謹閱

南京工部虞衡清吏司郎中臣呂胤昌

仁政

○弘治三年五月丙寅山西潞州衛并沁州守禦千戶所屯田被水災不及三分例不免糧

上以其民飢困方發倉賑濟不可復徵特免之

九月丙辰巡撫順天等府都御史徐懷奏順天府先年賑濟糧銀例當追徵還官但今年雖頗收而民猶不足

若一槩追徵必有逼勒之苦乞令衣食稍給之家徵十之五其次徵三之一極貧者暫為停徵庶小民可以蘇息

上曰賑濟所以拯民民尚不給又復追徵是重困之其即如擬行務使貧民稍得寬恤以俟來年再議

○弘治六年十一月庚申順天府府尹黃傑言畿內地方水旱相因貧民流移來京城者以萬計晝丐夜露多轉溝壑乞收入養濟院全活必衆實發政施仁之首事也戶部議以在京養濟院狹小豈能容此例應給糧遣還但隆寒之時恐在道失所宜命順天府籍其名于官大者人給糧三斗小者半之俟春暖仍送回俾所在官司

賑濟從之

○弘治十二年七月戊寅故事軍官卒無嗣者其母給俸五石母亡妻存給米二石金吾左衛千戶舍人王宗未襲卒子璽優給亦卒宗妻李氏乞給米兵部議宗及璽俱未襲官於宗不得稱故官妻於璽不得稱故官母但守節年久又係優給舍人之母請月給米一石終其身從之

○九月壬戌應天府上元縣老人周斌奏京城中人之家凡有死亡多無葬地不免火焚其鰥寡貧難者遂至委棄溝壑道路穢氣上干致生災變切恐天下皆有此患乞行各處有司買地官為封記扁曰義塚如有無地無

依之人亡者令所在鄰保相助置為衣棺葬於其內庶
鰥寡貧難者不至死無所歸工部覆奏謂先是監察御
史王相言京城之外原有漏澤園被人占種乞差官築
立牆垣明揭門額該管衙門各委吏役人等看守本部
已奉旨查理欲行南京工部并各布政司及直隸府州
縣舊有漏澤園者重增修飾無者即於本處城外選擇
空地創造或名漏澤園或名義塚葬埋無地無依之人
使死有所歸庶免致傷和氣

上曰小民貧難孤鰥死無所歸朕甚憫念所議是其亟行
天下各該衙門一體舉行不許虛應故事

○弘治十五年四月壬寅朔命順天府賑恤都城內外民

之孤寡殘疾及貧難無依者從戶部奏也

○七月辛卯命延綏鎮巡等官於沿邊各衛設立養濟院漏澤園各一所從工部左侍郎李鏐請也

○弘治十六年十月乙未戶部言湖廣山東蘇松等處災傷不減於浙江淮揚等處乞勅各巡撫巡按官各令所屬將預備倉粮并在庫官錢及贓罰紙價塩引等項銀兩自今冬至來年麥熟止按月驗口給賑仍停止遠年逋欠不急物料以蘇民困

上從之命即勅各巡撫巡按官用心賑恤無致失所

○弘治十八年五月丁亥先是

上以久旱憂切於心欲降勅諭頒寬恤十五事一内外重

囚情可矜疑者令問刑衙門奏讞一內外緝獲強盜妖言姦細多有貪功罔利及戳翻之徒誣陷重罪令問刑衙門從公研審如有冤枉即與辯理一監追贓物囚犯有年久家產盡絕者查奏發落一做工未滿囚犯例該發遣者俱免做工一京營官軍俱免做工不急工程悉皆停止外衛上班違限官軍五月內到者俱免罰班問罪一逃亡匠役俱許自首免罪弘治十七年以前突傷地方失班人匠俱免罰工一京邊騎操及各處孳牧寄養馬疋倒失虧欠買補追陪未完者量為寬免一各處稅糧并額辦坐派物料弘治十六年以前小民拖欠者量為寬免一各衙門科派物件具奏減免一各處解納

錢糧內外管事人員需索使用以致上納不敷重複徵
解令該部申明禁治一近來冗食數多該部查議裁減
一各處欽賞莊田有自收子粒管莊人等分外需索逼
民逃竄今後令有司徵收送用一南京運送馬槽馬椿
等物勞擾軍民悉皆停止令在京造用一各王府及鎮
守等官貢獻方物勞擾道路除舊例外悉皆停止一各
處盜賊有因飢寒失業嘯聚為非者所司出榜曉諭許
其自首免罪一內外府州縣養濟院令戶部及巡撫巡
按官申明舊例乞食貧民嚴督所司收養已令內閣視
草會

上不豫不果頒

今日
今上追念

先帝遺志乃載入登極詔及恭上

兩宮尊號詔內行之

恤民

○弘治三年十一月甲辰內閣大學士劉吉等言邇者玄象示戒妖星出於天津考之載籍妖星見為兵為飢為水旱死亡之徵今天下連年風雨不調南直隸河南山西陝西旱北直隸蝗蟲四川湖廣皆薄收倘明年再似今年閭閻無豐稔之樂盜賊萌竊發之機中原有事河道阻塞京城百萬生靈必致驚惶禍亂之作亦不難也惟望

皇上深思

祖宗創業之艱難今日守成之不易兢兢業業常如卽位之初奢侈用度一切減省游觀玩樂一切不行左右讒言一切勿聽異端經教一切勿作惟留心經史講求治道以古二帝三王自期庶幾人心懽悅

天意可回臣等又思近來工役繁興軍民困苦如沙河橋自成化十四年被水衝壞止用木橋往來亦便何必動衆改造見今天氣極寒軍士不得休息又如江西磁器內府所收計亦足用今又無故差內官燒造未免擾人南海子牆垣自有海戶可以修築今勞動軍士將及經年未見畢工其他差官勘事等項尤為繁瑣不能悉言

乞將沙河橋南海子做工軍士盡放休息燒造磁器內
官停止不差是亦弭災修省之一端也

上曰災變疊見朕深憂懼思圖消復惟在恤民今卿等言
天寒軍士久勞工役及燒造內官騷擾地方誠宜停止
其令金山口沙河橋南海子及王府做工官軍人等俱
與休息江西燒造磁器內官不必差庶副朕畏天恤民
之意

○弘治四年八月庚戌工部尚書賈俊言蘇松浙江近被
水患民不聊生而頃者織造段之令至於再三其數不
下數萬以瘡痍未起之民加煩重不堪之役誠可憫惜
乞暫令停免

上曰諸府既有水災今次所派段疋羅紗姑令停織俟明年秋熟後陸續織造供用

○弘治八年正月癸丑初永樂間因征北虜獲羊萬餘令順天府所屬州縣分牧歲辦羊毛價銀九百六十餘兩輸司設監供用謂之長生羊毛弘治間府尹黃傑言歲久羊已無存牧養人戶坐是亦多逃絕其價皆見存戶陪納民甚苦之已得旨除豁不復追徵至是司設監復以前令為言事下所司看詳工部具前旨以請

上曰羊亡毛存是無名之徵也況已有前旨其悉除之

○弘治九年六月庚寅浙江山陰蕭山二縣同日大雨山崩水湧漂廬舍二千餘間死者三百餘人事聞

上命量免被災人戶徭役其淹沒人口者給米二石漂損廬舍者二石

○弘治十年九月乙巳時山東濟兗青登萊五府水灾青濟二府蟲灾蓬萊黃二縣瘟疫命所司賑卹之溺死人口之家給米二石漂流房屋頭畜之家一石瘟疫死之家量給之其死亡盡絕及貧不能葬者給以掩埋之費

○弘治十二年八月乙卯工部覆奏監察御史張綸所言乞將畿內坐派物料量派各處及罷不急工作夫畿內之民固當愛惜但在外州縣出辦亦不為少已派者再難更改待後凡有派辦另為斟酌處置况工作不息派辦不止內府各該衙門年例成造雖有常規而數目漸

加近年愈甚雖本部多方經畫終是不敷乞行內外衙門凡有得已工程不許奏請興造及年例合用木植顏料大要以分數為率畿內府分比之在外量為從輕庶畿民得遂安養之業

上曰畿內重地百姓尤宜優恤凡百物料准如議從輕坐派

○弘治十三年二月壬寅有盜八十餘人剽劫襄陽安陸等府州民不寧居兵部以聞

上曰逆賊嘯聚流劫赤子何辜宜令所司盡心督捕期於必獲不可視常玩愒違者以失機罪罪之

○弘治十四年閏七月戊戌南北直隸山西山東河南等

處以水災告戶部請令所司各舉行荒政以恤民患
上曰各處既災傷重大人民艱苦其速勅巡撫巡按官用
心賑恤毋致失所

○十一月癸巳吏部尚書馬文升言直隸山東河南等處
災請行恤典并簡命臣僚以便宜賑濟因嚴捕盜賊停
止科差以蘇民困以固邦本

上曰地方災傷人民艱窘誠如卿所言該部即推能幹堂
上官二員會同各該巡撫等官用心賑恤毋致失所其
餘災傷地方奏內開具未盡者仍通查以聞戶部覆奏
謂刑部左侍郎何鑑大理寺右寺丞吳一貫可分任其
事又鳳陽等府山西等處亦報災傷乃文升奏所未及

者并請量行恤典

上從之命鑑一貫各奉勅以行其餘有災處行令各巡撫等官加意設法賑恤毋得虛應故事

○弘治十六年四月癸丑禮部以遼東火災之異請加脩省

上曰遼東災異非常即勅鎮巡等官痛加脩省利弊可興革者具實以聞被火之家盡心賑恤毋致失所

○弘治十七年正月癸亥江西南昌新淦二縣火焚南昌軍民居一百五十五家新淦焚公署四所軍民居一千餘家鎮巡等官以聞

上曰江西災異非常鎮巡等官其痛加脩省撫安軍民以